



REPUBLIKA E SHQIPËRISË  
**AUTORITETI I KONKURENCËS  
KOMISIONI I KONKURENCËS**

**VENDIM**

**Nr. 540, Datë 24.07.2018**

**“Mbi autorizimin e përqendrimit të realizuar nëpërmjet bashkimit të SIEMENS A.G me ALSTOM S.A”**

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 24.07.2018, shqyrtoi çështjen me:

**Objekti:** Autorizimi i përqendrimit të realizuar nëpërmjet bashkimit të SIEMENS A.G me ALSTOM S.A.

**Baza Ligjore:** Nenet 2, 10-12, neni 24, germa d, dhe nenet 53-64 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit” dhe formulari i njoftimit të përqendrimit”.

**Komisioni i Konkurrencës**, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë, mbi njoftimin e përqendrimit mbi bashkimin e shoqërisë SIEMENS A.G me ALSTOM S.A;

**VËREN SE :**

**Procedura dhe transaksioni**

Në datën XXX 2018 midis palëve Alstom S.A dhe Siemens A.G është nënshkruar Marrëveshja e Kombinimit të Biznesit. Marrëveshja parashikon se Siemens A.G do të zotërojë të paktën XX% të kapitalit aksionar të Alstom S.A. Emri i shoqërisë Alstom do të bëhet “*Siemens Alstom*” me logon “Alstom Pulse” me seli në Francë.

Siemens AG, është një shoqëri e organizuar dhe ekzistuese në përputhje me ligjet Gjermane, me seli të regjistruar në Mynih dhe Berlin. Bizneset e Siemens janë të përfshira në sektorët e energjisë dhe gazit; shërbimet e prodhimit të energjisë; menaxhimi i energjisë; teknologjitë e ndërtimit; lëvizshmëria/mobiliteti; fabrika dixhitale; industrinë e proceseve dhe të drejtimit; shërbimet financiare etj.

Siemens nuk operon në Shqipëri nëpërmjet ndonjë filiali të zotëruar apo dege të tij. Në vitin financiar 2016/2017 Siemens A.G ka realizuar shitje prej XXX Euro në Shqipëri. Pjesa më e madhe e shitjeve në Shqipëri janë gjeneruar përmes sektorit të energjisë dhe gazit, treg i cili nuk preket nga transaksioni i propozuar.

Alstom S.A. është një shoqëri e organizuar dhe ekzistuese sipas ligjeve të Francës. Alstom është një shoqëri aksionare e listuar në bursën Euronext të Parisit. Alstom është një lojtar global në industrinë botërore të transportit hekurudhor, duke ofruar një gamë të plotë të mjeteve lëvizëse (nga trenat me shpejtësi të lartë tek metrotë, tramvaje dhe autobusë elektronike); shërbime të personalizuar (mirëmbajtje dhe modernizim) si dhe oferta dedikuar pasagjerëve dhe infrastrukturës, lëvizshmërisë dixhitale dhe zgjidhjet e sinjalizimit.

Kjo shoqëri nuk ushtron aktivitetet dhe nuk realizon shitje në Shqipëri.

Transaksioni plotëson kriteret e përcaktuara në nenet 10 dhe 12 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, duke përbërë objekt shqyrtimi dhe vlerësimi nga Autoriteti i Konkurrencës.

### **Vlerësimi i konkurrencës**

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës”, tregu përkatës i produktit mund të konsiderohet tregu i furnizimit me mjete lëvizëse, sinjalizimit dhe elektrifikimit të hekurudhave. Duke qenë se transaksioni nuk pritet të ketë asnjë ndryshim në tregun shqiptar, pasi as Alstom dhe as Siemens nuk janë aktive në sektorin e mobilitetit në Shqipëri, përcaktimi i tregut përkatës të produktit do të lihet i hapur. Tregu përkatës gjeografik do të konsiderohet tregu i brendshëm, pra territori i Republikës së Shqipërisë.

Përqendrimi i propozuar ka për qëllim të bashkojë dy operatorë globalë të hekurudhave me vlera unike për klientët në nivel global dhe me potencial operativ. Kombinimi i përvojës së palëve, i ofertave të produktit plotësuese dhe shtrirja gjeografike do t'u mundësojnë palëve të investojnë në teknologjinë dixhitale të nevojshme për sfidat e lëvizshmërisë në të ardhmen në përfitim të klientëve dhe konsumatorëve përmes çmimeve më të ulëta.

Transaksioni i propozuar ka të bëjë me furnizimin e mjeteve lëvizëse, sinjalizimin dhe elektrifikimin e hekurudhave. As Siemens A.G dhe as Alstom S.A nuk janë aktive në ndonjë segment potencial të tregut përkatës të produkteve në Shqipëri dhe nuk gjenerojnë ndonjë xhiro brenda vendit në këto fusha.

Transaksioni i bashkimit të Alstom S.A me biznesin e mobilitetit të Siemens A.G nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar, kështu që në lidhje me tregun shqiptar nuk

identifikohen tregje të prekura, prandaj transaksioni nuk pritet të ketë asnjë efekt në tregun shqiptar.

Si konkluzion ky përqendrim nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

#### **PËR KËTO ARSYE:**

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

#### **VENDOSI:**

1. Të autorizojë përqendrimin e realizuar nëpërmjet bashkimit të SIEMENS A.G me ALSTOM S.A
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

#### **KOMISIONI I KONKURRENCËS**